



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Man City-i pound million 46.5
agi Reijnders alizükogo

Poland PM Tusk teimla tulu
nung confidence vote agitsü

VOL. XXII ISSUE NO. 238 (ADOK 238)

DIMAPUR

YANGTEPNÜ (THURSDAY)

AAMI (JUNE) 12, 2025

₹ 5.00

DAYO-i ILP atema tenüngsang agütsür

Dimapur, June 11, 2025 (TYO): Dimapur, Niuland aser Chümoukedima nung hopta ana shi Inner Line Permit (ILP) maparen akangakanga inyaka aruba atema District Administration nem tenüngsang agütsür ta Dimapur Ao Youth Organisation (DAYO)-i metetdaksüogo.

Mapang talangka lir ILP maparen inyaksü tenzükba ya law & order akangshiba lir aser DAYO-i akokba tashi administration nungita yaritsü ta parnoki ashi.

ILP maparen nung magistrate temi dang senchi achitsü tashi lir ta asüba ya ajaki meteta alitsüla aser kija mesüra telok shingaia iba nungi tajangzük angutsü memerangtsüla. ILP maparen ya kechi koma inyaka aotsü'ar metet aser tajangzük bushirtem aitsütsüla aser ozüing tapet agi merenshitsü tim ta Media Cell, DAYO-i sangdong ka nung ashi.

India nung political agreement ka ajanga akümba state ji Nagaland lir aser Bengal Eastern Frontier Regulation (BEFR) Act of 1873 ajanga nübortem maitsü, sobaliba, ali aser tarutsü kümzüka ayur. Nagaland state angudang nungi Dimapur ya Nagaland sorkar ketdangsübaren kübok adener anungji BEFR Act agi alenbanga lir aser Dimapur nungi ILP meyipa magientettsü ta parnokisa ashi.

June 29, 2019 nü Nagaland sorkari Register of Indigenous

Inhabitants of Nagaland (RIIN) tenzükba metetdaksüogo aser iba sülen Dimapur district ajunga nung ILP tenzüksüba sangoktsüogo. Küm pungu lir sülen December 1, 1963 cut-off year ser indigenous inhabitants aser ali kiburtem atema ILP exemptions agizükogo ta DAYO-isa metetdaksü.

Külen, Citizenship Amendment Act (CAA) mapa tenzükba aser Assam nung National Register of Citizens (NRC) yangluba ajanga nisung lakh 20 shi talidak mali kümdaksüogo. Anungji Nagaland nung alirtemi ILP kübokzünyanga alitsüla. Asen arrtsü adena nisungtem zübazüba senzüsenbonger anungji Nagaland nung kin hohotemi Assam aser Nagaland nung Election Photo Identity Cards (EPIC) nung Illegal Bangladeshi Immigrants jangjatsüla ta DAYO-isa ayongzük.

Nagaland nung lanurtemi iba tongtipang mapang ya odang mesüidaksütsüla. ILP ya ozüing maparen ka ka dang masü anungji Nagaland nung lanurtem meyipa arung, meranga inyakdi aser asen sasa liteta aotsüsa rongsenketzüing ajungkettsü ayongzükür ta DAYO-isa ashi.

Dimapur nung senso ajaki ILP dak sendakba onüktem bangdakpur dangi abentsü aser telemsa aser terata nung melii tangatettep aser telongjem nung liyonga odi ta DAYO-isa ayongzükogo.

MP Supongmeren-i Railway Stations semdang

Dimapur, June 11, 2025 (TYO): Lok Sabha MP S. Supongmeren Jamir-i June 10, 2025 nü Dimapur, Sukhovi, aser Molvom Railway Stations semdangogo.

Iba mapang Supongmeren-i Indian Railways ketdangsürtem aser Dimapur o Chümoukedima district tem nung State Government Departments balala den ajurutepe sendentem amen.

Dimapur Railway Station nung MP Supongmeren-i Dimapur aser Lumding Railway Divisions ketdangsürtem den sendentem amen.

Iba senden nung District Administration, Nagaland Police Department, Land Revenue Department, aser Nagaland State Transport Department, Dimapur District ketdangsürtem aden.

Senden nung Dimapur Railway Station Upgradation Project indang benoka lemsatep.

Idangji Railway ketdangsürtemi Nagaland nung Lumding-Furkating Railway Line Doubling Project dak sendakba khuretem lemsatep. Item khuret ya odang yutsüra Nagaland majangi lenmang melenshitsü akok ta ketdangsürtemi ashi.

Sukhovi Railway Station nung

MP Supongmeren-i Railway ketdangsürtem aser Chümoukedima Additional Deputy Commissioner (ADC) aser Additional Deputy Commissioner of Police (ADCP) nung den senden amen.

Iba station nung passenger aser freight services senzüdar aser support infrastructure talila nüngdaker ta ketdangsürtemi ashi.

Sukhovi Railway Station nung permanent police outpost ka amenoktsü, livestock screening & quarantine facility nüngdaker aser Inner Line Permit (ILP) checkpoint with integrated detention and deportation capabilities alitsüla ta ketdangsürtemi ashi.

Sukhovi Railway Station nung staff quarters maliba aser station nungi National Highway den sendaktepba lenmangtem tia kanga mejungi aliba indang ketdangsürtemisa MP Supongmeren dang ashi.

Supongmeren-isa Molvom Railway Station semdang aser Nagaland nung infrastructure projects mapang shitak nung tembanga inyaksü atema Centre dang maneni teyari meshitsü nangzük.

A.K Mishra-i Naga yimten teloktem den ajuruteper

Dimapur, June 11, 2025 (TYO): Naga yimjung olemtep nung Centre atema interlocutor A.K. Mishra Mongulbar nikongdang Chümoukedima tonga arur telok balala den olemteptsü tenzükogo.

Bodbarñü Mishra-i Naga National Political Groups (NNPGs) balala den sendentem amen aser Camp Hebron nung NSCN-IM general secretary Th Muivah den-a ajuruteper.

Naga yimten melatetba atema Naga nunger tezü atanger ta Working Committee, Naga National Political Groups (WC, NNPGs) nung Working Convener Isak Sumi-i ashi.

"Mapang talangka Naga nunger terata nung dang lidakja arur. Mapang atsülangba agi tezü atanger aser jashiteper. Tesüiba nung Naga political groups longjemer meinyakba ajanga tamakoktem angu aser aibelen ajak atema Naga nunger tatok meshir" ta Isak Sumi-i ashi.

"Tangbo Naga political

groups, civil society organizations, kin balala lennirtem aser tamangba rejutem ajak dener sentong ka atonger. Tang ya shibai agreement nung sign asü ta masü saka külem aser ajak adenba telemtetba ka agitsü atema inyaker" ta pai ashi.

"Forum for Naga Reconciliation (FNR) kübok Core Naga Reconciliation Committee maparen nung onoki amalitepa yariteper aser India sorkari lemtet ka agütsüdang ajak külemi longjemtsü imlar" ta Isak-isa ashi.

"Onoki yangi Agreed Position atema kibur tenüing agitsü atema aruba masü. Onok yangi lemtet ka agidaksütsü atema Naga lennirtem ama aru" ta WC member P. Tikhath-ia ashi.

"Telok balalai agreements ana sign sütepa lir saka anaprong ya nükjidong ka atema dang. Mapang nung ana ya lemtet ka dang akümtsü" ta NSCN(R) president Wangtin Naga-ia ashi.

WC, NNPGs sasep nung

telemsa adokba atema tebilemstsü abener saka lennirtemi item onük ajanga yimjung maparen nung tetsükdaksü maludaksütsüla ta ashir.

"India sorkari telok balala sasep nung meputep aliba dak merangloker, parnoki ajaki agizüktetba aser akhümtsübuba lemtet ka aginür. Asenoki tang alima dang asenok longjema lir ta sayutsüla" ta C. Singson-ia ashi.

"Mapang atsülangba ya Centre-i dang masü saka Naga telungpur telok balala sasep nung meputep aliba ajanga lir. Tang ya tatok agütsüba mapang ka, agizüktetba mapang ka lir. Naga yimten tebilemstsü ya telok ka indang masü saka Naga nunger ajak indang lir" ta pai ashi.

"Tanü Interlocutor A.K Mishra den senden tajung menogo aser senden amenba nükjidongji tekara nung Naga yimten latettsü atema liasü" ta WC-NNPGs secretary & Ceasefire Supervisory Board (CFSB) supervisor G Naga-ia metetdaksü.

'Operation Honeymoon': Sonam-i Raja tepsetba nangzükogo

Guwahati/Shillong June 11, 2025 (Agencies): Shillong nung Sessions Court kati Bodbarñü Sonam Raghuvanshi aser tai tonglokja alir nisung pezü anogo 8 nü Meghalaya Police ket nung ayutsü temelaba agütsüogo.

Taoba ita Sohra nung Indore tourist Raja Raghuvanshi tepsetba ken o dak sendakba nung iba temelaba agütsü.

Bodbarñep ketdangsürtemi District and Sessions Judge Shillong indang okadaki par punguprong anir ao.

"Okadak iba ken o ghonda ka shi angadanga sülen anogo 8 nü police ket nung ayutsü temelaba agütsü" ta East Khasi Hills Superintendent of Police, Vivek Syiem-i ashi.

"Parnok dang asüngdangya tenzüksü aser idangji kuli aika jangjatsü. June 2 nü Raja mang anguba süken onoki tai tonglokja alir ajak anema kulitem peria dang bendena lir" ta Syiem-i ashi.

La tetong Raj Kushwaha

Police-i Wai Sawdong Falls nung aliba parking lot nung crime reconstruction asütsü ta paisa ashi.

Meghalaya police-i Mongulbar aonung Sonam Raghuvanshi Shillong-i anir aru. Hombarnü Uttar Pradesh nung Ghazipur court kati anogo asemnü transit remand agütsüba sülen Sonam anir aru. Külen, Meghalaya police-isa Raj Kushwaha, Vishal Chauhan, Anand Kurmi, aser Akash Thakur nunger Indore, Madhya Pradesh nungi anir aruogo. Parnok Bodbarñep Guwahati atong aser iba sülen gari ajanga Shillong-i anir aru.

Par pungupronglai Raja Raghuvanshi tepsetba nung shilem agiba nangzükogo. Raja ya Sonam kinungbo liasü.

Sonam Raghuvanshi-i Special Investigation Team (SIT) tsüngdang lai la kinungbo Raja Raghuvanshi tepsettsü tasa atongba nangzükogo.

La tetong Raj Kushwaha

teyari agia la kinungbo tepsettsün tasa atong ta lai nangzük.

Ghazipur nungi Shillong tashi ghonda 27 agia arudang Sonam-i police den o mejembi aser tanep 11:00 ako nungi la dang asüngdangya tenzükdang lai la ya auertem ket nung takoksa angur ka ta lephsia ashi.

Ajisüaka, SIT Shillong Police-i la dang CCTV footage dena kulitem sayudang la nüktzü alua ajeb aser nangzük.

June 10 nü Sonam tetong Raj Kushwaha aser pai hire asüba contract killers asem- Vishal Singh Chauhan, Akash Rajput, aser Anand Kurmi nungeri Raja Raghuvanshi tepsetba nung shilem agiba nangzüka liasü.

Sonam aser Raja na May 11 nü Indore nung kibong aküm aser honeymoon atema Meghalaya-i aru. Tena May 23 nü Nongriat village nung homestay ka toktsür ao aser iba sülen anogo 10 lir Raja tasü mang angu.

Nagaland nungi kaketshir anati SSHP, Japan nung shilem agitsü

Dimapur, Aami/June 11 (TYO): Ministry of Education, Government of India-i Samagra Shiksha Nagaland kübok Government Schools nungi HSLC nung takok tajung ngutetba kaketshir aser Nagaland nungi Government Schools nung science azünger ana Sakura Science High School Program, Japan nung shilem agitsü shimtetogo.

Kaketshir ana ya Ruzhukhrie Government Higher Secondary School, Kohima nungi Shethilu Medeo aser Chumoukedima

Government Higher Secondary School, Chümoukedima nungi Zomawii Lushai alitsü.

Sakura Science High School Program (SSHP) ya Science nung Youth Exchange Program ka lir. Ibai Japan Science and Technology Agency (JST) indang sentong ka lir, koba India nung Ministry of Education ajanga yarir. Ibai high school azüngba kaketshirtem dak scientific curiosity adokdaksütsü, cultural exchange aser international collaboration asoshi lir.

Gihukali Sema, PGT

Chümoukedima Government Higher Secondary School, Chümoukedima ya parnok indang supervisor ama shimtetogo.

SSHP 2025 Japan ya June 13-21, 2025 tashi alitsü. Anogo tenet sentong ya Ministry of Education, Government of India ajanga sponsor asütsü aser iba mapang Japan nung school, university aser technological aser cultural sites balala semdangtsü.

Kaketshir temi sentong balala nung shilem agitsü aser presentations tongmelang agi agütsütsü.

Longleng nung Immunization aser Diarrhoea atema senden amen



Dimapur, Aami/June 11 (TYO): Extra Assistant Commissioner Longleng, C. Tsalmise Sangtam, NCS mendenpuba sür Deputy Commissioner, Longleng indang Conference Hall nung June 11, 2025 nü District Task Force for Immunization and Stop Diarrhoea senden ka mena liasü.

Chief Medical Officer, Longleng, Dr. Tiasunep-i tarur pela agizükba o jembidang, immunization, saksü-pokshi wara nungi kumzüka alitsü mera aser mürekmejua alitsü indang tongmelang agi rasaa ashi.

Pai iba senden nung adener dang diarrhoea, ORS aser Zinc tablets amshiba indang awareness nüburtem nem agütsü ayongzüka liasü.

District Immunization Officer (UIP-RCH), Longleng, Dr. Imtjungshi-i immunization, district percentage of zero dose children, dropout rates aser dropout kuli tem osang agüja liasü.

Pai district nung immunization coverage takok mongutetba kuli tem rateta ashi aser NGOs aser stakeholders dang target percentage tongtetsü asoshi yariteptsü ayongzüka liasü.

Diarrhoea ya intestinal tract nung infection ajanga timba adoker, koba bacterial, viral aser parasitic organisms ajanga adokdaksür, ta pai ashi.

Infection ya chiyongtsü tamajung achi-ajemba mesüra mürekmeju masüba ajanga nisung ka dak nungi ka dak

menar, ta pai ashi.

Tzü tajung ajemtsü, mürekmejua alitsü, sapon amshia teka shidokba ajanga saksüpokshi tashidak menaba aser prokshia aoba nungi ajemtsü, ta pai ashi.

Saksüpokshi agi menepa alir nem oral rehydration solution (ORS) agütsütsüla, koba tzü temürek, shini aser metsü meyoktepba lir. Iba den anogo 10-14 atema supplemental treatment course asoshi dispersible zinc tablest agütsütsüla, ta pai ashi.

Tanur nem routine immunization vaccine agütsüba nung Social Welfare, School Education, aser Health & Family Welfare amala department temi yariteptsüla, ta EAC ajanga ashi.

Tuensang nung district level DA-JGUA atema senden amen

Dimapur, Aami/June 11 (TYO): Tuensang nung aliba department balala nung Ministry of Tribal Affairs kübok Dharti Aaba Janjatiya Gram Utkarsh Abhiyan (DA-JGUA) mapa kuma inyaksü atema district level committee senden ka June 10, 2025 nü Deputy Commissioner, Tuensang indang Conference Hall nung mena liasü.

ADC Tuensang, Shelley Katiry-i iba sentong indang

rateta jembiba mapang, tribal tem aliba yimtsüngtem nung DA-JGUA ajanga lenla balala nung terenlok bener arutsüba indang ashi aser nükjidong tongtibaji nükjidong yur linük tesem ajungalen tribal nisungtem alidak services aser infrastructure yanglutsütsüba lir, ta ashi.

Ministry of Tribal Affairs ajanga "Dharti Aaba Abhiyan - Awareness and Benefit Saturated Camp" nungja agütsür campaign ya June 15-

30, 2025 anogotem agitsü aser iba ya 'individual entitlement' aser DA-JGUA indang awareness agütsütsü asoshi lir, ta pai ashi.

Iba campaign nükjidong ya nüburtem nem sorkar indang sentong aser scheme balala indang awareness agütsütsü asoshi lir aser yangji Ayushman Bharat, Aadhaar Camp, KCC, MNREGA, PMAY Housing aser danga welfare schemes balala lir, ta pai ashi.



OFFICE OF THE
LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614, Dist. Mokochung : Nagaland
Email : Langpangkongkaketshirmungdang@gmail.com

Ref. No. LKM/GS/CON-04/25
Date: 10/06/2025

SASASETTER

Langpangkong Liküm chanu Longkong nangpong, Langpangkong Kaketshir Mungdang(LKM) asoshi Shisa Tuyur(Advisor) takoktet Wb. Imti LKR, tanü akümüli tempangba osang angashia sasasetter, nemjemer aser Langpangkong kaketshir rangpen-i mang ayimer.

Pa ama Taremzü, Shisa taka tesotet nübu tajung Alima nungi pila-a aonung Langpangkong nunger ajak asoshi takoksa tulu ajuruko ni.

LKM-i pa mapa tajung kodanga mamatetsü.

LKM ajanga iba tako marok pai toktsür aoba mangyimer kibong, adianutem, kinunger aser Langpangkongsanger ajak den lemsatener



IMLINOK
PRESIDENT LKM



MEYITONGPANG
GENERAL SECRETARY LKM

Khensa Village Council ajanga jangjashitsür

Dimapur, Aami/June 11 (TYO): Khensa Village Council ajanga sangdong ka nung, June 10, 2025 nü St. Joseph School, Khensa anasa atalokba indang osang ka jangjashitsüogo.

Iba ya nisung aputsü merangba mesüra mapa tamajung inyaksü merangba indang masü. Aser iba tatalokba nung dena alir ya Khensa yimtsüng nung akir masü. Pa ya tekolok meshidak aser school anasa senzua liasü, ta sangdong ajanga ashi.

Yangji alirtemi yaritsü asoshi pa dangi ao, saka iba nisungba ya jena ao aser ibaji tim masüba mapa inyaker ama angateta osang tiazü kanga

kera prokshia ao, ta ashi.

Iba tatalokba yagi kuli tejangja makai osang aser olulu jenti temai adoka yimtsür-yimer dang masü dangar tem dena khuret agütsür. Anungji nüburtem, talisa media outlets aser social media amshirtem dang kanga kumdanga inyaksangshia mejangjaba osang prokshiba nungi pila alitsü ayongzüker, ta Khensa Village Council sangdong ajanga ashi.

Asen chir aser asen nüburtem kumzüka ayutsü ya teinyaksü tongtipangtiba lir. Nüburtem kumzüka ayutsü asoshi mera agiogo aser iba tatalokba dak sendakba nung timtem kecha mali, ta KVC sangdong ajangasa ashi.

Arr atsütepba nung Nagaland & NE states tem ajungtsü: TWFI



Kohima, Aami/June 11 (TYO): International jenjang nung tokteptsü asoshi Nagaland aser danga northeastern states tem ajungtsüm kechiaser region nung aliba nüburtem dak tashi balaka lir aser saisapong tanüla lir, ta Tug-of-War Federation of India (TWFI) ajanga ashi.

Taküm September ita Nottingham, England nung World Tug of War Championship alitsü sentong yanglua aliba nung shilem agitsü asoshi India Team Selection Trial alidang, iba saisapong nung Arunachal Pradesh, Manipur aser Nagaland amala state tem nung nükla tajung lir, ta TWFI tir Hari Shankar-i ashi.

"Parnok pasasa tashi tait. International jenjang nung toktepa medals bener arutsü

asoshi techniques tem nung training shidak agütsütsü nüngdaker," ta pai ashi.

Team India atema trial ya 13 Assam Rifles ground nung agia liasü, kong Uttar Pradesh, Arunachal Pradesh, Pondicherry aser Nagaland nungi shilem agia liasü.

"Onoki Indian teams pezü yoktsü sentong lir, aser kaji Nagaland nungi alitsü," ta Shankar-i ashi.

Linük nung Tug of War ya school, yimtsüng, benjongbentsü aser südoksenem atema asayar, aser iba saisapong nung skill aser tasa nüngdaker, ta pai ashi.

"Technique aser tashi shidak amshia professional yimya nung asayara, terepranger asoshi iba asaya ya jangratemtsü akumer,"

ta pai ashi.

Alima nung arr atsütepba ya linük 71 nung asayar, koba Europe nung kanga bulua asayar, koba International Tug of War Federation aser International Olympic Committee ajanga agizüka lir, ta ashi.

India nung iba saisapong ya Government of India-i agizüka lir aser state units balala nung federations lir.

"Onoki küm nung iba asayamung national championships ya trokben nungi tenetben tashi ayongzüker aser international jenjang nung anaben mesüra asemben shilem agir. Taoba küm Germany nung shilem agi. Taküm Nottingham aser Malaysia nung shilem agitsü aser taruba küm

tetenzüklen South Africa nung shilem agitsü," ta Shankar-i ashi.

Tug of War ya cricket mesüra football amabo masü, saka iba yagi lanirtem nem pei sempet sayutsü asoshi sapang agütsür aser sports quota nung sorkar mapa atema maongka lapoktsür ta pai ashi.

"Tug of War ajanga tangbo asayar noklang aika sorkar mapa inyaktar," ta pai ashi.

Nagaland nunga iba asaya nung lenirtem tenüng sanga jembidang, "Dr. Vekho Swuro-i mapang tatsüka tsüngta Nagaland unit amenoka renlok daksüba nung mapa tajung inyakogo. Asüng onoki Chief Minister ajurutsü aser Nagaland nungi asayartem metetpelatsü," ta ashi.

Iba selection ya ajanga

saisapong nung teimla tasen agütsütsü aser international jenjang nung Nagaland nem konang bener arutsütsü imlar ta TWFI tiri ashi.

Iba sentong nung tongti tesemdanger, MLA Dr. Tseilhoutuo Rhutso-i jembidang akhi alemli mapang nungi asaya aruba saisapong ya telungjem, teamwork aser tashi indang temaitsü ka lir ta ashi.

"Nisung meimchir temi asayaba asaya tejentiba rongnung arr atsütepba ya ka lir. Iba yagi temang nung tashi aita kisüng masü saka telungjem ajanga tashi balaka agütsüba sayur," ta pai ashi.

Tanü iba sentong ya ajanga asayar aika nem tarutsü asoshi jenjang tajung bener arutsütsü imlar, ta paisa ashi.



June 11, 2025 nü North Arabian Sea nung Indian Navy-i INS Tabar rong nung Passage Exercise (PASSEX) agidang tangokba noksa nung angur. Iba exercise nung UK Carrier Strike Group indang HMS Prince of Wales aser HMS Richmond rongtem-a amshir.

India nung nütsüנג million 1,463.9 jungogo: UNFPA

New Delhi, Aami/June 11 (Agencies): Alima nung nütsüנג teimtiba aliba linük, India nung nütsüנג billion 1.46 jungogo ajisüaka Total Fertility Rate (TFR) shilem 1.9 ajema kümogo, ta United Nations Population Fund (UNFPA) report ajanga metetdaksü.

2025 State of World Population (SOWP) report ajanga ashiba agi, tebilemtsü tulubaji nütsüנגji masü saka kibongtemi tanur kwi agitsüar telemtetba agitsü asoshi nija ka nem temeden agütsübaji lir.

UN report ajanga "Tang India nung nütsüנג million 1,463.9 lir" ta asadangteter.

"Tang alima nung nütsüנג teimba aliba linükji India lir. Iba linük nung tang nütsüנג billion 1.5 jungnua lir aser maneni billion 1.7 ajungba sülen ajema aküm tenzüksü," ta kasa report ajanga metetdaksü.

Tang India nung Total Fertility Rate (TFR) ji tetsür ka shia tanur 2.0 lir. Iba tetezü, India nung tetsür kati mashisa akümtsü mapang (arrshi küm 15-49) tashi nung tanur ana asotsü. Iba rate ya 2000 küm nungi tang tashi kasa dang liasü, ajisüaka tang report tasenba ajangabo tetsür ka shia TFR ji 1.9 dang kümogo; tetezü tetsür shiai tanur ana mesüra iba dang nungjagi tajemba asotsü.

India nung TFR ajema akümyonga lanur nütsüנג aika lir- arrshi küm 0-14 pur nütsüנג shilem 24, arrshi küm 10-19 tsüנגdapur nütsüנג shilem 17 aser arrshi küm 10-24 tsüנגdapur nütsüנג shilem 26 lir.

Tang India nung nütsüנג shilem 68 bo arrshi küm 15 nungi 64 tsüנגdapurtem lir aser nütsüנג shilem 7 ji teintet sensotem (arrshi küm 65 ser

temapur) lir.

2025 küm tashi nung teburtem 'life expectancy at birth' ji arrshi küm 71 lir aser tetsürtem life expectancy ji arrshi küm 74 lir.

UNFPA India Representative, Andrea M. Wojnar-i, "India-i fertility rates ajemdaksüba nung takok nguogo. 1970 küm tetsür ka shiai tanur pongu shi asoba nungi tanübo tetsür shiai tanur ana shi dang asor, aser iba ya shisaliok jenjang tajungba akümba aser tanur asoba tsütsü healthcare tajungba agütsüba agi lir," ta metetdaksü.

"Iba ya ajanga tanur asodang asüba kanga ajema kümdaksüogo, tetezü tanübo tanur tetsütem aika taküm mesama taküm lir, tanurtem tajungtiba aniteter aser loktiliba yangerba nung shilem agir," ta Wojnar-isa metetdaksü.

Delhi nung Israeli Embassy anasa longkak aiter kaketshirtem apu

New Delhi, June 11 (Agencies): Mongolbar nikongdang New Delhi nung kaketshirtemi Gaza tensa aser Freedom Flotilla Coalition (FFC) züנגsem kar apuba anema longkak aita Israeli Embassy leni aoba mapang nung police-i longkak aitertem apu.

All India Students' Association (AISA) aser Jawaharlal Nehru University Students' Union (JNUSU)-i ayongzükbä sentong nungji kaketshirtem aikati shilem agi.

Gaza nung rara ajanga meimchirtem timtemba aser ozüנג alema Freedom Flotilla Coalition züנגsemtem apuba anema longkak aita sentongji ayongzükbä.

Flotilla ya Palestinian humanitarian mission pusemba telok ka lir.

Police-i JNUSU Tir Nitish Kumar aser AISA Secretary Saurabh na densema kaketshirtem 30 shi apu. Police-i ashiba agi, kaketshirtemi longkak aittsü atema jelia temelaba magii longkak aitba agi kaketshirtem pua Bawana police station-i anir ao.

Longkak aitba sülen AISA-i sangdong ka ajanga, police-i tashiyim amshi aser longkak aitertem anema ketdangsertemia tashiyim amshi, ta tai tongloksü.

Israel-i Gaza amakba aser meimchirtem timtemdaksüba anema AISA-isa India aser Israel nati amalitepa inyakba mapatong ajak anentsü, raraba hadir shishilembaba tezüנגzüktep agientsü aser rongsenkettzüנג tesendaktep raksatsü takhangba agütsü.

July 1 nungibo Aadhar alirtemi dang tatkal ticket mekazüktettsü

New Delhi, Aami/June 11 (Agencies): July 1, 2025 anogo nungi tenzüka Tatkal scheme kübok Aadhar alirtemi dang train tickets mekazüktettsü, ta Bodhbarnü Railway Ministry-i metetdaksü.

June 10, 2025 nü Railway-i zones ajak dang, "01-07-2025 anogo nungi Tatkal scheme kübok tickets ji Aadhaar alirtemi dang Indian Railway Catering and Tourism Corporation (IRCTC) websites /iba app ajanga mekazüktettsü," ta metetdaksü.

Iba dak alia July 15 nungi tenzüka Tatkal kübok ticket mekazüksü atema Aadhaar-based OTP authentication

asütsü.

"Tatkal tickets ji Indian Railways indang counter nung computerized PRS (Passenger Reservation System) aser authorized agents ajanga mekazüksü, aser ibaji OTP sülen ang inyaktettsü. OTP ji mobile number ajanga yoktsü. Iba ya-a 15/07/2025 anogo nungi mapa küma benoktsü," ta Railways-isa metetdaksü.

Railway ministry-isa Centre for Railway Information Systems (CRIS) aser IRCTC danga iba inyakyim tasen benoktsü atema nüנגdakba mera agia inyaksü aser zonal railways ajak nem iba osang metetdaksütsü tuyuogo.

PM Modi-i Operation Sindoor outreach nung shilem agirtem ajuru



New Delhi, June 11 (Agencies): Ato kilonser Narendra Modi-i Operation Sindoor outreach nung shilem agia linük balala semdangba MP tem ajuruogo.

'Operation Sindoor' outreach kübok Parliamentary team tenet-i linük 33 semdanga liasü. Team tenet nung züנגsemtemji parnok 50 liasü. Team shia nungji MP tem, taoba mapang ketdangsertem aser yimtenren lenirtem liasü.

Mongolbar nikongdang Ato kilonser Modi'er kidang party balala nungi MP tem

asertongti ketdangsertemi parnoki linük balala nung ketdangsertem ajuruba osang lemsatet.

Tesülen Modi-i X ajanga, "India tenüנג nung linük balala semdanga India-i yimjung atema inyakba aser kiralongra samatsütsü lemsatetba nung shilem agirtem ajuruogo. Parnoki India ola sangdongba atema asenok ajaki nüma atanger," ta metetdaksü.

Operation Sindoor outreach kübok team tenet nung lenirtemji- BJP nungi Ravi Shankar Prasad aser Baijayant Panda na, Congress MP Shashi Tharoor, JD(U) nungi Sanjay Jha, Shiv Sena nungi Shrikant Shinde, DMK nungi Kanimozhi aser NCP(SP) nungi Supriya Sule nung liasü aser parnoki aniba team shia nungji züנגsem 5-7 liasü.

Iba outreach programme kübok tem shiai US, Europe, Middle East, Africa aser Southeast Asia nung linük pongungu semdanga liasü.

UP nung inverter battery ka apokba lendong nung tambur ka asü

Amethi (UP), June 11 (Agencies): Bodhbarnep Uttar Pradesh kübok Amethi nung ki ka nung inverter battery apokba lendong nung tambur ka asü aser pa kinüngtsü kanga mejungi yiru, ta police-i metetdaksü.

Iba lendong ya Amethi kübok Mardauli yimdak atalok.

Kidang inverter battery apokba lendong nungji arrshi küm 62, Naurang Bahadur Singh asü aser pa kinüngtsü Anusuya Singh (60) kanga mejungi yirua Amethi Community Health Centre-i anir oa treatment agiba sülen maneni Gauriganj nung aliba

district hospital-i anir ogo, ta police-isa metetdaksü.

Amethi CHC nung inyaker Dr Saurabh Singh-i, "Battery apokba lendong nung Anusuya Singh ji zübo aita keta kanga mejungi yiruba agi onoki la district hospital-i anir aotsü tuyu," ta ashi.



Government of India
Ministry of Social Justice & Empowerment
Department of Social Justice & Empowerment

Department of Social Justice & Empowerment, Government of India-i **02-06-2025** anogo nungi tenzüka **SCs atema Top Class Education Scheme** kübok scholarships atema **tasenpur aser renewal** students naprongla asoshi **National Scholarship Portal** lapokogo.

Küm ka nung source ajak nungi income sen lakh 8.00 tashi dang anguba kibongtem nungi SC students aser iba Scheme kübok metetdakja aliba institutions nungi **full-time prescribed course** atema admission agia alirtemi item **institutions nem lezmükja aliba scholarships (slots)** ajanga scholarships angutsü temsüa lir.

Iba portal ya 31-10-2025 anogo nung shibangtsüa akok (Tentative).

Form fill up asütsü atema telatetbatem tejangjaji **NSP Portal** nung angutsü. Form fill up masüdag candidate temi **socialjustice.gov.in/schemes** nung Schemes Guidelines kübok **temsüa ali-mali rebrangtsü akok** mesüra teküboklen agüja aliba **QR code scan** asütsüla.





TIR YIMYIM YIMOBILEM (EDITORIAL)

DIMAPUR THURSDAY, MAY (AAMI) 12, 2025

Aizawl-bo train agi tongogo !

Asenok rongnung shirnoki Assam nungi Mizoram yimtiba Aizawl-i gari nung odangogo, parnoki Aizawl lenmang temesü aser longrenbang ajanga aodang tsüinseta bilemer alitsü. Iba lenmangji asenok Nagaland nung jajaba gari lenmang dang nungi tetsüintsü taketba, kanga atang aser longren ajanga aoer. Ajisüaka, asenok mapa mali o o dang, anungji train agi Kohima tonga atutsübo pongmang ama alidang, pibo tan ita nungibo longren longbang ajakji ajangdanga tua train agi Aizawl atongtsü. Iba train lenmang ya Assam nung Hailakandi district kübok Bairabi nungi Aizawl yimti anasa Sairang tashi nung kilometer 51.38 lir aser iba lenmang nung senzüba train jagi ghonda nung kilometer 90 tashibo karaa jajattettsü. Atangji, train lenmang kilometer 51 ya khi nung renemba masü saka 2024 küm Bairabi nungi Hortoki tsüngda kilometer 16.72 tashibo senzütsüsa commission asü aser tanüngbaji tan ita nungisa tenzüka senzütsü asoshi sentong yanglutsü dang anünga lir. Iba train lenmang kilometer 51 ya tenem tarok aika ajangdanga tur külenang Aizawl atonger asünungji, Bairabi nungi Aizawl tashi tetsüngda nung ali telonglen nungi tenem tudanga aoba tunnel 48, apu tulu 55 aser apu tula 87 yanglua lir. Item aputem tangitba tongshitemji ali nungi azük tashi nung apu kabo feet 300 dak tali talang lir, anungji iba apujibo Qutab Minar dang nungi feet 130 shi agi talangba asütsü. Ano, iba train lenmang nung gari lenmang azüklen overbridge 5 aser gari lenmang telonglen apu 6 yanglua lir. Aji oda, longren longbang ajangdanga dang masü saka tenem tudanga train lenmang yangluteta yimti atongba mapaji tesümgangtsü aser jangratemtsüka lir. Iba jagi nübortem kanga ajangzüksü, aji oda teinyakertemi kanga meranga inyakba reprangteter aser iba ama nübortem ajangzüksü atema inyaksüba mapa tulu inyakba nung lisopurtemia meinperong mesüi inyakdaksüba agi teinyakertema kecha balaka timtem shisabolu majurui mapang shitak nung renemtet südi. Iba nungji asenok Nagaland nung alir Naga nungertem tangazüktsü aika lir. Asenokbo küm shia tatar senden nung train lenmang tejen Dimapur nungi Tizit aser Tuli tashi aotsüsa inyaksü aser Dimapur nungi Züba, Kohima tashi train jajatsüba indang jembi, ajisüaka tejembi tama ta asür asü mesüra asenoki Railway pur mulung koka mejembitet asü mesüra telong pur atemer tema purtemi timtem tuluba agütsüba agi mapa küma mienyakteter ? Aji oda, asenok den külem kasa mapa tenzükertem kasa mapa, kasa kiojen renemer semzük dang aser train lenmang renemer train nung senzüa sayudang, asenoki item denji asen mapatem medemdanga akseta bilemer asü mesüra kecha balaka tamakok amai mebilemer ? Assam nungerbo joko asen arrtsülena anüng nungi dang mittsü aser Itanagar, Aizawl aser Agartala yimtitem tashi train agi atonger. Idangji, asenokbo ajak dang tejenba train station Dimapur train station-a tuluba aser tajungba küma yanglutsüba sen lir ser nung meyangluteter aser asen lima among süngküm tashi nunga mitkartem akümketa nokdaksüsa inyakyim tajunga kata meyangluteter ta alitsü na ? Ibaji dang masü saka asen lima nung tayimtsü anendaka alima ajaklen nungi arua anentettsüsa international airport dena yanglua akatsü melen asenoki tang akaba tayimtsü anendak tilaka yaa asenok pi tsüngdang nümadangtettsüsa anepalu mesüteter. Joko, tanü putu nungbo asenoka tangar menepa renlokdi süra ali nung aser anüngdaka aser ayong tulu alirbo tzü nung dena melamelaa oli aruli sütettsüsa gari, train, tayimtsü aser rong lenmang shitak junga yanglutsübaji kanga nüngdak kümogo. Ibaji angateta, asenoka asen kidang kiyonger state-tem nung terenlok mapatem takok ngua inyakbatem ya danga ngur, asenoksasa asenok ajungshitsüla aser asen masü asen lima aser asen nübör tama ta bilema tajung inyak tenzüksü tim. Tangbo asenok aikati nübortem meyong agi asen meyong akümer aser nübortem asoshi inyaksü melen asen asoshi inyakba nung mapang aser rongsen agi meperir. Itemji meyipteptsüla aser nübortem rongsen agi asen rongsen masü asen rongsen agi nübortem asoshi inyakba sobaliba tajung asentenshitsüla. Iba jagi train agi Aizawl amaji, memetetika Kohima aser Mokochung tonger alitsü.

OLEMSABANG

Yimsüsür dak nüburi tamang kaatettsüsa yimsü asütsüla

~ L. Kika Pongener

(Yashi adok nungi...)

Ano kinuk-kisang kar nungbo, sorkar school-tem nung tesayurtem pei inyakba school posting-i moi, temelen tangar tesayur (Substitutes Teacher) yua alitsü akok. Sorkar School ajak nung tesayurtem ajunga 'Qualified Teacher' -tem dang lir, saka, shibai metet school kar nungbo under-gratuante teacher-ang kar temelen yua alitsü akok. Ashiko, ano out-post School kar nungpo tesayur peria mali, saka jila tulu Kohima & Dimapur amala nung School kar nungpo tesayur nungdakba dang nungi talila yua alitsü akok. Ano ashiko, tesayur karbo Directorate aser District Education Office nung tanga mapa lezmüksür yua alitsü akok. Aji oda, School-tem nungpo tesayur agi meperir saka menungdakba nung 'office attachment' nung yua alitsü akok. Ashiko, küm shia High School leaving Certificate (HSLC) Exam. nung sorkar school Result majungba ya iba amala küitem yagi majunger asütsü akok. Anungji item ajakji kaketshirtem-i kanga tenuk yoka repranga inyaksüla aser sorkar nem metetdaksütsüla. Ano kinuk-kisang kar nungbo sorkar mozü-kitem nung Doctors aser Nurses peria mali, mesura Doctor aser Nurses-tem pei alidak posting nung shitak maliba agi nübortem teyari peria mongutetba tesem kar nungbo alitsü akok. Ano tesasatsüka, out-post nung aliba nübortem karbo sorkar mozü-ki nung Doctor & Nurses mapang shitak nung maliba agi shirangertem kümzüktettsüba sernung mekümzükteti sua-adokba-a karbo denjia alitsü akok. Anungji sorkar mozüki-tem nung Staff shitak ali mali (?) item ajakji jila aser yimtsüng nung yimsüsürtemi kanga tenuk yoka nendak-nendaka reprangtsüla.

Ano India lima nung kangasa sensaker kibong 'Below Poverty Level' (BPL) nung alir aika lir. Item ama sensaker chirnurtemji School-i chi mechiyungi arur....Anungji itemji chiyungdaksütsü atema Sorkar-i 'Mid day Meal' Scheme ajanga sorkar school ajak nung senotsü teyari agutsür. Iba sen agutsüba school kar nungbo tim mesui amshiba-a osang angazüker. Aji oda, angazükba amaji tim mesui amshia lira....Iba dangji sensaker chi-auso rakzükrakdemer ta ajatsü. Ano sorkar school nung, school uniform & text book sorkar-i angadi agutsür. Anungji item ajakji shitak agutsür asü magutsür (?) aji nübortem tenuk yoka reprangtsüla. Ano sorkar-i kangasa sensaker kibong Below Poverty Level (BPL) nung alir kibongtem nem PHH aser AAY Ration Card ajanga ita shia sen jenjang dalang agi aser angadi agi jang (Rice) agutsür. Ano mapang kar nungpo jang dang masü Sugar, Dal, Kerosene oil itemjia agutsür. Anungji item ajakji shitak agutsür asü magutsür (?) ta tenuk yoka reprangtsüla. Ration Card ajanga Sugar, Dal, Kerosene oil kechisa angur itemji nübör tangutsü tim (Entitlement) lir. Anungji Ration Card Holder ajaki magili ta mesui anguba ajakji shitak agizüktsüla, kechiyong aji nübör tangutsü tim lir. Nübör tangutsü tim shitak jenjang dalang agi agutsüba pelasete agizüktsü melena khangshia alidaktsür ta ola adokbaji kangasa tamashi lir. Shitakbabo itemji shitak magutsüba/manguba atema dang nübortem ola atoktsüla. Tawa Social Media sabang nung Ration Card nung Dal agutsüba atema Fair Price Shop kibur anema khangshia alidaktsür ta nübortem ola adokbaji kangasa tamashi lir. Nübör meyong tangutsü tim (Entitlement) magutsüra/mongura ibaji sorkar tai asütsü....Saka sorkar-i tagutsütsü tim shitak agutsür Ration Card Holder-temi pei meyongji agizüktsü memulungra ajibo nübör tai asütsü. Anungji Ration Card nung nübör meyong tangutsü tim Sugar, Dal, Kerosene oil etc. kechisa angur item ajakji nübör ajaki pelasete agizüktsüla.

Anungji nüburi sorkar dak temulong lemtettsüsa aser tamang kaatettsüsa sorkar kaji alitsü kanga tongtipang lir. Sorkar kati telemtetba agiba mela-mela meyipa agitsüsa masü kanga junga shisadanger dang telemtetba agitsüla. Aji oda, sorkar anema nübortem inyakyim aika nung ola adoktsüsa asüba, sorkar atema konang-nungsang ka masü maaksu ta bilemstsüla. Anungji sorkar nungi tenzüker alua talakba yimtsüng tilatiba tashi nung, nübör atema teyari aser terenlok mapa inyaksü sorkar-i sen agutsüba agi, tatongtsüpur shitak atongtsüla aser teyari angutsürtema shitak angutsüla. Sorkar-i terenlok mapa nungdem nung agutsüba sen agi sorkar nukjidong atalokdakja terenlok mapa-a shitak inyaksüla. Kanga tesasatsüka, asen lima nung sorkar nungi tenzüker yimtsüngtem nung terenlok mapa inyakba reprangdanga, teimba ka nung ochimashi inyakba angur....Nübör atema aruba sen agi ketdangser kar dang ajangzüker aser kar dang takar akümer. Anungji sorkar tenzüker nungi shir yimtsüng nung yimsüsür ajaki pei nem ketdangsutsü nungloktsüba mapa nung ochishia ketdangsua inyaksüla. Sorkar dak aser jila aser yimtsüng nung yimsüsür dak nübortem tamang kaatettsüsa aser temulong lemtettsüsa alitsü kanga tongtipang lir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

RCM leniba nung India tesem ajaklen Khristantemi longkak ait



June 09, 2025 nü Odisha yimtiba, Bhubaneswar nung Khristantemi longkak aitdang tangokba noksa nung angur.

June 11, 2025: Rashtriya Christian Morcha (RCM) leniba nung June 09, 2025 nü India linük tesem ajaklen Khristantemi longkak aitogo.

India nung Khristantem anema inyakba aser Khristantem bendanga züngshiba anema Khristantemi state aika nung longkak ait.

Longkak aitba sentong ya Rashtriya Christian Morcha (National Christian Front)-i ayongzüük. Iba telok ya India nung Khristantem temeden kümzüütsü atema inyakba telok ka lir.

National Christian Front-i BAMCEF (All India Backward and Minority Communities Employees Federation) aser Bharat Mukti Morcha den longjemer parnoki iba sentong ya ayongzüka liasü.

National Christian Front-i shidi ajanga India nung aliba Arogotem aser Khristantem dang India nung Khristantem anema inyakba tatalokbatem aser Khristantem bendanga züngshiba anema ola adoka tesünep nung longkak aittsü ayongzüka liasü.

June 9 nü longkak aitba sentong tembangba sülen district aika nung Khristantemi district collectors ajanga linük Tir nem temepishiba shidi agütsü.

Rajasthan, Chhattisgarh, Odisha, Haryana, Uttar Pradesh aser Bihar densema state aika nung longkak ait. Rajasthan nunga Bikaner, Pratapgarh, Banswara, Jalore, Sirohi, Ajmer, Karauli, aser Bharatpur district tem nung longkak aita liasü.

Ajmer yimti nung Khristantem District Collector office kima ajurutepba sülen longkak ait, iba sülen parnoki Tir nem temepishiba shidi agütsü.

Chhattisgarh nunga Bilaspur, Janjgir-Champa, Raigarh, Raipur aser Mungeli district tem nung longkak ait. Raipur nung Khristan 200 shi Ambedkar küralyanglu anasa adenshi. Putir Sebastian Pumattam-i sarasadema sentong tenzüük, iba sülen Dr Ambedkar nem akhüm agütsü. Rev. Sandeep Lal-i Tenüngsang Ken tapu 82 azüing

aser Rev. Dr Akhilesh Edgar leniba nung linük temzüng okila zünga liasü.

Raigarh nunga Khristan 300 shi Ramlila Maidan nung adenshir longkak ait. RCM Chhattisgarh tatong tir Rev. Dharam Sai Sarthi-i iba sentong nung shilem agirtem dang pelaba lemsatep.

Odisha nunga Bhubaneswar, Ganjam, Bhadrak, Gajapati, Khordha, Sambalpur, Nabarangpur, Sundargarh, Sonapur, Malkangiri, Koraput, Angul, Mayurbhanj, Cuttack, Kandhamal, Bargarh aser Keonjhar district tem nung longkak ait.

Uttar Pradesh kübok Mathura nung Ambedkar Bhavan nung Khristantem adenshiba sülen yimti tesem balala nung yimyim ayima jaja. Parnoki "Khristantem anema inyakba anenang", "Tenla kitem amakba anenang," "Caste census agiang," aser "EVM agienang- Democracy kümzüükang" ta yimyim ayima liasü.

Bihar nunga RCM State Tir, Rev. Dr Shambhu Kumar leniba nung Khristantemi longkak aitba sülen Nalanda District nung ADM nem temepishiba shidi agüja liasü.

Khristantemi district collectors ajanga linük Tir nem agütsüba shidi nungji 2023 küm May ita nungi tenzüka Manipur nung Khristantem anema inyakba, nisung 250 tepsetba aser Tenla ki 360 dak tali raksatsüba indang shia lir.

Shidi nungjisa 1950 küm Presidential Order ka ajanga Khristan yimsü dangi meyipertem nem Scheduled Caste jenjang magütsüba aser Uttar Pradesh, Chhattisgarh, Madhya Pradesh densema state aika anti conversion özüngtem tim mesüi amshiba indang shia lir.

Haryana kübok Bhiwani nung RCM Women's wing nung Tir Pastor Sunita aser RCM women's wing tatong Tir, Surendra Bhola nati, nütsüing crore 140 aliba linük nung Khristan nütsüingbo shilem 2.3 dang lir, aser Khristantemi linük temzüng kübok alir, ta

metetdaksü.

Tenatisa United Christian Forum report nung ajemdaker, 2023 küm linük nung Khristantem anema inyakba tatalokba 734 dang liasü saka 2024 küm nungbo item ama tatalokba teimba kuma tatalokba 834 liasü, ta metetdaksü.

Khristantemisa linük nung Khristantem anema inyakba tatalokbatem jungjunga bushisüngdangtsü, anti conversion özüng tim mesüi amshiba nokdangtsü aser senso ajak nem yimsü temeden kasa agütsütsüla, ta takhangba agütsü.

Khristantemisa yimsü nung ajemdaker tim mesüi inyakba nokdangtsü atema national commission ka tentettsü, nütsüing ajema alirtem kümzüütsü atema police aser ketdangsertem nem training agütsütsü aser Khristantem anema inyakba kanga bulua atalokba state tem nung security junga agüjang, ta takhangba agütsü.

Longkak aitba sentong ya RCM aser Bharat Mukti Morcha nati ayongzüük aser Rashtriya Pichhada Varg Morcha, Rashtriya Adivasi Ekta Parishad den Rashtriya Muslim Morcha tentettemia pusema liasü.

"Linük nung lisopur Khristantem anema inyakba anema June 9 nü Rashtriya Christian Morcha aser Bharat Mukti Morcha nati ayongzüükba sentong kanga takok ngua agitetogo. Iba sentong takok ngua agitetba atema Tsüngrem nem tenüngsang aser sentsüwangshi ajak agütsü. Iba dak alia state aser district presidents/coordinators aser pastor tem, putirtem, reverends aser tamanger ajak dang kanga pelar," ta RCM-i metetdaksü.

RCM lenirtemisa, linük nung Khristantem anema inyakba maneni atalokra July 1 nü linük tesem ajaklen "Bharat Bandh" ayongzüütsü, ta metetdaksü.

Bharat Bandh ji RCM National coordinator aser BAMCEF Tir Waman Meshram lenisüba nung agitsü, ta RCM-isa metetdaksü.

ANOGO ABEN TSÜNGREM DEN

Temeimtsü maketba meimang

"Saka adianu meimtepba indang nenok dangi zülutsü tenüngdaksü maka, kechiaser medemer o medemer na meimteptsü Tsüngremi nenok dang sayur". 1 Tesalonika 4: 9.

Mission field nung tebilemstsü tulutibaji kechi? Telangzüba tajungtibaji, Arogo nung tebilemstsü tulutibaji kechi asütsü ? Atangji, arogo nung kati ka dang memeimtetba ajanga mission field nung tebilemstsü adoker.

Arogo nung telemsaji tsükchir takok tulutibaji lir. Arogo nung rongrong, mangatettep aser o atsütepba mamangertemi angashir. Pa ni mangatettepi aliba telok ka nung adentsü menüngdak ta lemteter.

Shirrnosti tangar den jangyu medema mouteter, kasa nisung jagi pa temetetbaji ano tali telemsa adokdaksüba mapa nung amshitsü meranger. Telok shiai pei meden bushitepa kuli bendentsü aser tanela jenjang nung parnok tajungba ta bilema tangarji mezüngmeshitsü.

Iba tesayuba ya kodang tamanger kati Khrista pei Kibur ta agizüker, iba nungji kati ka dang meimtsübaji keta aliba jakla ka lir. Tasen akümba mulungsentsü, Tanela Temeshi aliba, aser Khristai asenok dang meimteptsü bilemtetdaksür. Tanela Temeshi tejang temeim lir.

Oba, tamangertem rongnung meimteptsü özüng agütsüba asoshi Ne tenüng asanger.

Iran tsür Khristan Laleh Saati jail nungi chiokogo



Laleh Saati

June 11, 2025: Iran tsür Khristan ka tesüiba ita 15 tashi Evin Jail nung puokba sülen tawa chiokogo, ta osang ka ajanga metetdaksü.

La ya Islam yimsü toktsür Khristan yimsü agizüker ka lir; "Zionist" Christian organisations den la tesendaktep lir, ta aija la küm 2 tepuokdak ayutsü obendang agüja liasü, ajisüaka ita 15 shi dang jail nung puokba sülen chioker.

Arrshi küm 46, Laleh Saati May 31 anogo nung chiok, ajisüaka la nem tenokdangba aika agütsüogo. Lai osangbenertem den mejembitsüla aser Iran linük adener tangartem den-a mejembitsüla. Iba dak alia la küm 2 tashi bendangleni aotsü makok.

Tamalen Saati-i Iran toktsür Malaysia nung jenoka ali; iba mapang nungji lai Khrista

agizüka baptiba sülen Khristan ministry mapa yakyaka inyakba liasü.

Lai Malaysia nung alitsü temepishiba agütsü, saka telangzüba menoa mangu. 2017 küm la Iran-i meyipa aruba sülen lar tsüraburtem anepalua liasü.

2024 küm February ita nung la Iran yimtiba, Tehran nung tebuer kidang lia apu, iba sülen la dang hopta asem tashi asüngdangyaa liasü.

Court nung ken o angadangba mapang nung ketdangsertemi Malaysia nung lai Khristan mission mapa balala inyakba indang noksa aser videos kuli agüja liasü.

Iba sülen yaküm March ita nung court-i, lai Iran linük security anema inyak, ta la aija liasü.

La jail nung aliba mapang nung la nem medical treatment magütsüi la kanga timtema liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tenüklang**

(n) shibalang, tetsüung nung temola ser aluba tatembanglak (ankle)

* Tetsüung agi jajadang tenüklang meyirutsüsa tsüungsem semer jajatsüla.

Tenükshitsü

(adv) taginütsü, aginüa reprang (enviable, admirable)

Alima nung tenükshitsü aika lir saka ajakbo tajung masütsü.



Tir Yimym

OLONG PAITEP # 7179

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

1. Nüji masü
3. Technütsüka
7. Aketa shirangba
8. Pi
9. Amana
10. Kinü
11. Tanang masü
13. Lenmang
15. Nübo tedi
16. Tuoshi
17. Shiruru apuba temenatsü

-

(4)

-

(6)

-

(5)

-

(6)

-

(5)

-

(5)

-

(6)

-

(5)

-

(6)

-

(5)

-

(6)

-

(4)

LANGTSÜNGLEN

1. Jila tulu
2. Sarasademdang tembang
4. Tarutsü indang ashirtem
5. Alia
6. Mojing
9. Tai inyakba metet
10. Medemer chijiba
11. Tatokba / Amadok
12. Anüngdang masü
14. Jabaso masü

-

(5)

-

(4)

-

(6)

-

(5)

-

(5)

-

(6)

-

(6)

-

(5)

-

(5)

-

(4)

OLONG PAITEP # 7178 TELANGZÜBA**TIPIEN :**

1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüung,
10. Omen, 11. Lemta, 13. Ola,
14. Kin.

NAI-A YA METETTER MA

Iran nunger Meraj Zamaniyan-i Guinness World Record ka yanglutetogo aser ibaji "most football touches with the feet on a treadmill in 1 minute (male)" lir.

Meraj-i minute ka nung 181 taps sütet aser iba ajanga alima otsü tasen yangluteta liasü.

Sohra nung alirtemi Raja Raghuvanshi nem tetushi agütsü

Shillong, June 11, 2025 (Agencies): Sohra nung alirtemi Raja Raghuvanshi nem tetushi agüja candlelight sentong ka agiogo aser iba ajanga hill station ya tesemdangertem atema lendong maliba tesem ka ta osang sangoktsüogo.

Sohra nung 5-kilometre peace rally den külemi candlelight ceremony ayonga agi aser iba nung Sohra nung alirtemi tourist Raja nem tetushi agütsü.

Iba sentong nung MLA Gavin Myllem, MDC Titosstarwell Chyne, aser traditional chiefs Freeman Sing Syiem o Marremdor Syiem nungeria shilem agia liasü.

Raja Raghuvanshi aser pa

kinungtsü Sonam nati Sohra semdangdang samar bushitep. Iba nung state aser national rescue teams-i yaritepa liasü aser anogo tenet lir ketdangsürtemi Raja mang angu aser iba tatalokba dak sendakba nung Uttar Pradesh nung Sonam apu.

Sohra nung waterfalls aser cave systems reprangtsü atema tourist kanga arur aser tena samaba sülen nisungtemi iba hill station nung tourist lendong nungi jenbua mali ta masüba osang prokshitsü tenzüka liasü.

"Tourists ya onok kibong nung züngsemtem ama lir", "Sohra topur ajung reprangi arung", "Tourist ajak Sohra-i pelashishia agizüker" ta sentong

nung adenertemi tezülubatem amer shilem agia liasü.

Nisungtemi tawa Sohra tenüung menükjaka India aser international tourist maneni arur ta tourism ketdangsürtemi ashi.

Raja Raghuvanshi tepsetba ken o atema bushisüngdangba mapang kija aser media outlets-i Meghalaya aser Meghalaya nung nung menüktsüogo ta Cabinet Minister Alexander Laloo Hek-i ashi.

"Raghuvanshi mang mangu tashi nisungtemi Meghalaya, Meghalaya police aser Meghalaya nung nung menüktsüogo. Social media, national media aser Sonam o Raja Raghuvanshi na kinungertemi Meghalaya tenüung menüktsü" ta Hek-i ashi.

Rosmita Hojai mang Uttarakhand nung angu

Haflong, June 11, 2025 (Agencies): Arishi küm 26 tain Rosmita Hojai mang Uttarakhand kübok Pauri Garhwal district nung nguogo. La ya June 5, 2025 nungi samar bushitepa aru aser June 10, 2025 anepdang tüküm nung la mang ngutetogo.

Ketdangsürtemi la asüba atema bushisüngdang ka tenzükogo aser iba dak sendakba nung nisung ana pua lir.

Rosmita Hojai ya Dima Hasao kübok Hojai village nungi liasü aser RRB (Railway Recruitment Board) tatidang agütsütsü atema Delhi-i ao.

Rosmita ya Haryana nung engineering studies renemer Guwahati nung APSC exam atema renemshia aruya liasü. June 4 nü tatidang agütsütsü atema la Delhi-i aoer ta lai lar kinunger nem osang sangokja liasü.

June 5 nikongdang lai tetsü dang la train nung meyipa arutsü

ta phone ajanga ashi aser iba ya lar kibong atema teratatsü osang ka liasü.

Rosmita-i teti jangajangja dang jembi aser tiyazü kodanga mejembi ta tetsüi ashi aser nisung kari Rosmita dang iba ya shidaktsü asütsü akok ta lar kinungertemi bilem.

Police-i Rosmita mang post mortem atema bener ogo aser bushisüngdang ka tenzükogo.

Iba ken o dak sendakba nung police-i Mohinderagarh, Delhi nungi Hemant Sharma aser Rohtak, Haryana nungi Pankaj Kokar na pua lir.

"Tena yagi Shivpuri P.S nung Rosmita Hojai tzu agi ponger aoba osang sangoktsü" ta police-i ashi.

June 5 nü RRB tatidang agütsüba sülen Rosmita-i lar medemer ana den külemi Uttarakhand-ia ao.

June 6 nü lar medemer tebur ana den Rosmita Rishikesh

atong. Tena rongnung ka taoba mapang lar classmate Hemant Sharma lir. Par asem Shivpuri nung camping trip ka alitsü sentong atong saka nikongdang tashi nung lar medemer anati la samaba osang agütsü.

Iba sülen iba tesem nung alir kati campsite anasa tetsü ka tzu nung araksetba angu aser iba jagi Rosmita tzu agi ponger ao asütsü akok ta bilem.

Iba osang nung ajemdaker Haridwar police-i mang bushitsü atema State Disaster Response Force (SDRF) divers nem mapa lezmüksü aser Mongulbarnü Rosita indang mang angu.

Jadikhe Naisho Hosom (JNH), Dimasa Students' Union (DSU), aser Dimasa Mothers' Association (DMA) dena Dimasa telok balala longjemer Union Home Minister Amit Shah dang Rosmita Hojai asüba atema high-level investigation asütsü takhangba agütsüogo.



GOVERNMENT OF NAGALAND
DIRECTORATE OF INDUSTRIES & COMMERCE
NAGALAND : KOHIMA

**ADMISSION NOTICE -2025**

Applications are invited from interested and eligible candidates for admission to the AICTE approved 3-Year Diploma Programmes (In collaboration with the Department of Technical Education, Nagaland) for the Academic Session 2025-26 at Nagaland Tool Room & Training Centre (NTTC), Dimapur.

S. No.	Course Name	Minimum Qualification
1.	Diploma in Mechanical Engineering	HSLC/10 th passed in Maths & Science from a recognised Board.
2.	Diploma in Computer Science & Engineering	

Application forms and brochure can be collected from the office of NTTC, Dimapur on all working days (Mon-Fri 9:00 am to 4:00 pm). Application forms may also be downloaded from the website <https://nttcdimapur.org.in/>, in which case an application fee of ₹300/- (Three Hundred only) may be paid/ deposited at the time of submission.

Mode of selection: Oral Interview

Admission going on for the new Academic Session 2025-26

Limited period offer:
Free Admission till 30th June 2025

For further details, visit the website: <http://www.nttcdimapur.org.in>

or contact the following Course Coordinators:

i) Mechanical Engg. : 8787383944/ 7005162525.

ii) Comp.Sc.& Engg. : 93833 08489.

(Front desk: 8974444806.)

Sd/- P. Tokugha Sema
Director of Industries & Commerce
& CEO (NTTC)

• Website: www.nttcdimapur.org.in • Email-ID nttcdimapur@gmail.com
 New Industrial Estate, Near District Jail Junction (Tinali), Diphu Road, NH-36,
 Dimapur-797113, Nagaland.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND: KOHIMA

No. DHFW-5-23/TRG-NSG/2022/2158-62

Dated, Kohima the 11th June 2025.

ADVERTISEMENT

In pursuance to Govt. approval No. MED-9/1/89(Pt-1)/307 Dated Kohima, the 3rd June2025, interested candidates from bonafide Indigenous Inhabitants for the State of Nagaland are invited to undergo 2 (Two) years course in FHW (Female Health Worker) /ANM (Auxiliary Nurse Midwife) Training for the academic session 2025-2026 at School of Nursing, District Hospital Tuensang.

- Candidate should be PU (10+2) in any stream with 40% from recognized English medium School Board and 45% from Recognized National Institute of Open School.
- Unmarried Female Candidates.
- Minimum and maximum age for admission will be 17-25 Years as on 1st January 2025.
- Number of seats is 30 (Thirty).
- Application Forms will be issued during Office hour at Directorate of Health & Family Welfare (Room No. 210) at the cost of Rs. 200/- (Two Hundred) only.
- Issue of application forms will be on 23rd to 27th June 2025.
- Last date of submission of application form shall be on 1st July 2025.
- Issue of Admit Card will be on 18th& 19th August 2025.
- Application form duly filled up along with necessary document/certificate duly self- attested should be submitted along with theST/SC/BT and Indigenous Inhabitant Certificate, which is compulsory.
- Incomplete application, if submitted, will be summarily rejected. List of rejected application will be paste in the Office Notice board.
- No separate calling letter will be issued.
- There will be written and viva test (Date will be notified later)
- No Government job is assured after completion of Training.
- Backward Tribe Reservation policy (15%) will be followed as per Govt. Notification No.HTE/RESEV/23-1/ 2012 dated, Kohima the 30th May 2016.
- Person with Disability (PWD) may also apply for FHW/ANM under the categories, DW-Dwarfism/LC Leprosy cured/AAV-Acid Attack Victim.

SD/- DR. MERENINLA SENLEM

Director & HOD

Directorate of Health & Family Welfare,

Nagaland : Kohima.

Poland PM Tusk teimla tulu nung confidence vote agitsü



Warsaw, Aami/June 11 (Agencies): Parliament nung kanga tongtipang confidence vote agitsü lia linük nung yimsü asütsü asoshi par pro-European Union coalition nem tashi agüja lir, ta Poland Ato Kilonser Donald Tusk-i ashi.

Ita tetenzüklen tir election agiba nung par ally Rafal Trzaskowski ya nationalist Karol Nawrocki-i tsükdaktsüba sülen par sorkar samatsü ta takzütepba yong Tusk-i vote ya agiteptsü ayongzüik.

Menden 460 aliba Sejm mesüra lower house nung Tusk'er Civic Platform party meketa centrist coalition menden 242 lir, aser pai iba

confidence vote nung takok angutsü temulung lema lir, aser yangji pa bhukumer timba lir ta mesayutetera 2027 matongdang elections agitsüsa akumtsü.

"Poland nung yimsü asütsü ya maongka lir. Poland nung kechi ataloker, item mapa ajak asenoki inyaktsü asen ket nung temelaba lir," ta Tusk-i yimten yimsüsürtem dang Bodhbarnü vote agütsütsü lia ashi.

Nationalist Law and Justice party (PiS) nungi 2023 küm October ita sorkar melenzüikba sülen defence nung sen tali indokba aser migrant nem visa agütsüba nung ajemba ya par sorkar takok tulutem ama

züngshia liasü. Ajisüaka iba confidence vote nung takok angu yonga arishi küm 68 tain lenir asoshi tetenzük tasen ka bener arutsü teimla kangabo mangur, kechiaser tir election mapar par coalition kanga sashia anokshitsü aser nisung 38 million aliba linük nung far-right bhukumer tali akumba ajanga pa lenisüba nung temulung masür.

Tir election agiba sülen Tusk'er sorkari nübuyimba mapang nangzüikba ama meinyak ta aitsüba tali akumer, kong parnoki abortion law teladakba akumtsü, judiciary asendenshitsü aser tax-free income threshold timba kumdaktsütsü nangzüka liasü.

Parliament nung agizükba legislation ya Poland tiri veto asütsü tashi lir, anungji Tusk'er sorkari temelenshi benoktsü merangba maparen nung tetsükdaktsü ajurutsü amai lir.

Ukraine den tesendaktepa tamajungba akumtsü akok, kechiaser Ukraine ya NATO nung züngsem akumtsü Nawrocki-i memulunger, aser Poland nung Ukrainian refugee tem aniokba nunga memulungi liasü.

US-China tsüngta shishilempaba tesendaktep tajungba akumtsü

London, Aami/June 11 (Agencies): alima nung economy tulutiba linük ana tsüngta shishilempaba tsütsü mepetmesü adoka aliba ajemtsü asoshi framework ka yangluba sülen anidaktsü tepang agibo mulungtepogo, ta US aser China ajanga ashi.

Iba tezüngzüktep yagi 'rare earth minerals and magnets' nung tenokdangba agüja aliba angatetteptsüla, ta US Commerce Secretary Howard Lutnick-i ashi.

Parnoki iba sentong ya agizüka mapa kuma inyaktsü asoshi pei-peii linük tir - Donald Trump aser Xi Jinping - dangi

bener aotsü ta anatsülen nungi ashi. Beijing aser Washington nungi ketdangsürtem London nung ajurutepa anogo ana jembishinüba sülen iba osang ya sangdonger alitsü.

China-i rare earth minerals ayokba ya tongtipang sür senden nung jembia liasü, koba modern technology asoshi kanga tongtipang lir.

Taoba ita Washington aser Beijing nati trade tariffs khen soita atatsü mulungtep, saka iba sülen linük ana ya kati ka dak iba tezüngzüktep nung aibelener ta tai tongloksütepa liasü.

Smartphones nungi tenzüka electric vehicles tem tashi

yangluba nung kanga nüngdakba rare earth metals aser magnets tem ayoktsü yokba nung kanga nüshir, ta US-i China dak tai tonglokja arua liasü.

Kasa mapang US indang semiconductors aser danga artificial intelligence (AI) dak sendaktepa aliba technology amala osettem China-i alizükba nung Washington-i tenokdangba agüja liasü.

"Geneva consensus mapa kuma inyaktsü asoshi onoki framework ka renemogo. Ibai tir temi agizükba sülen mapa kuma inyaktsü bushitsü," ta Lutnick-i osangbener dang ashi.

(Maneni tapak 8 nung...)

MULUNGNEN O

Lt. Imkongkumzuk Jamir

23.01.1984 - 04.06.2025

Ozü temeim jabaso Imkongkumzuk Jamir ajungbena iba lima nungi pilar onok mangyim jashi tia nung alidang, kija-kibong, tembar- medemerterm, kinunger-adianutem, kidang-kiyongertem, arogo, lokti tentet aser temeimertem shirnokisa onok dang meima nüngdak maparen ajak nung yaritepogo, nenok ajak dang onoki kanga pelaba metetdaksür.

Onok timtem jashi nung aliba mapang nenok temeim sarasadem, nübo aser rongsen agi yariba ajakji onok tashi aser tesünep angudak liasü. Onoki nenok nisung shia dang tenüngteta pelaba meshitetaka, nenok temeim aser teyari agi onok mulung kanga anisüngzüikogo ta metetdaksüner.

Taochisang Tsüngrem Kibubai nenok ajak talubosa moajangma ta onoki sarasademtsür.

- Temeim Kinungertem.

Iran-i U.S. base tem amaktsü amokmeren

Dubai, Aami/June 11 (Agencies): United States den nuclear atema sensaksem tamakok ngua mangatettep adokra Iran-i parnok meketa aliba America nunger base tem amaktsü, ta Defence Minister Aziz Nasirzadeh-i Bodhbarnü ashi. Iran aser US na nuclear atema sensaksem trokbuba agitsü lia Aziz-i iba olen ya lemsatepa liasü.

"Tanga telok nungi ketdangsür kari sensaksem takok mongutetra mepetmesü tenzüksüba amokmerener. Mangatettep adokra host linüktem nung onoki tonga aliba U.S. base tem ajak amaktsü," ta Nasirzadeh-i osangbenertem den sensaksemba mapang ashi.

Nuclear dak sendakba nung ken o tangatettep ka dangai marura Iran nung bomb pokloksütsü atema U.S. tir Donald Trump-i aiben amokmerena arudar.

Taruba sensaksem ya iba hopta agitsü lir. Trump-i ashiba agi, sensaksem ya Brehostibarnü agitsü aser kasa

mapang nung Tehran-i ashiba agi sensaksem ya Deobarnü Oman nung agitsü. Taoba mapang US-i benokba onük koba Iran-i magizüki liasü, iba dak sendakba nung telangzüba ka Iran-i benoktsü imlar. Trump-i Mongolbarnü ashiba agi, nuclear sensaksem dak sendakba nung Iran tali tesashiba küma odar.

Nasirzadeh-isa, Tehran-i tawa warhead ton ana bener missile ka tendangogo aser parnok azüoktsü merangba magizüker, ta ashi.

Iran lenir Ali Khamenei-i February ita ashiba agi, Iran-i missile tem densema military terenlok asoshi jenjang agitsüla.

Iran nuclear ken o atema sensaksem ya joko mapang talangka agia arudar. Trump mezüngbuba term tir asüba mapang pai iba tenangzüktepba nungi atsüingin aser Iran nem tenokdangba tesashi agüja liasü. Ajisüaka tanabuba term

tenzüikba mapang asendenshir sensaksem tenzüikogo, saka tang tashi takok monguteti arudar.

South Korea-i North anema amshiba loudspeaker tem shibangtsüogo

Seoul, Aami/June 11 (Agencies): South Korea military-i ashiba agi, parnoki arrtsü adena North Korea-i osang balala yoktsü atema amshiba loudspeaker tem shibangtsüogo. Linük ana tsüngda kati ka dak temulung lemteta akümtsü atema iba jenjang agiogo.

South nung Lee Jae-myung tir akümba sülen hopta ka lir tang iba jenjang ya agiogo. Lee-i election atema nüboyimba mapang Korea linük ana tsüngda tesendaktep tajungba küma yanglushitsü nangzüka liasü.

Pyongyang-i, loudspeaker propaganda broadcasts ya rara menaba ama agir aser taoba mapang speaker tem ya poktoktsütsü amokmerenogo.

Iba inyakyim ya küm trok tashi anena liasü, saka taoba küm June ita nungi tenzüikshi.

Pyongyang-i balloon tem nung jana bener South-i yokba sülen loudspeaker broadcasts ya tenzüikshia liasü.

Kümtem tsüngda loudspeaker ajanga broadcasts asüba nung Korea linük anaprongla aser bendanglen osangtem aser iba den democracy dak sendakba nung osang balala aser South nung libaliro indang metetdaksüba densema lir.

Taoba tir Yoon Suk Yeol kübok North aser South Korea na tesendaktep tamajungba küma ao.

December ita mapang tatsüka atema martial law benokba sülen Yoon ya mapa nungi anenja liasü. State anemertem aser North Korea pusemertem inyakyim tali küma odar ta shia pai martial law ya benoka liasü.

(Maneni tapak 8 nung...)

Nicholas Pooran MI New York captain kümogo



Aami/June 11, 2025 (Agencies): Arishi küm 29 tain wicket-keeper batter Nicholas Pooran, taruba Major League Cricket asayamung atema MI New York team captain asütsü shimogo.

Pooran ya 2023 MLC season nung asayar ajak dang run (388) timtiba yangluba asayar liasü, aser pa lenisüba nung team takok asoshi iba asayamung nung asayatsü.

Left-handed batter ya T20 asaya nung asayartem ajak rongnung tajungtiba ka lir. Pa tang temaba jenjang nung asaya aliba mapang captain asütsü shimogo.

Pooran-i taoba mapanga Major League Cricket nung kanga junga asayaogo aser talisa, 2023 MLC Final nung par team-i asaya akokba asaya

nung pai out mesüi run 137 yanglua liasü.

"Onok hero aser skipper! Nicholas Pooran - arishi küm 29 tain pocket dynamite, shiba dang MINY superstar ta ajar, pa Major League Cricket 2025 season metenzük tsüngda MI New York captain asütsü shimogo," ta club sangdong ka ajanga metetdaksü.

Pooran, shiba mimlai lia Hombarnü international cricket asaya nungi anenogo, pa captain jenjangi ajungkettsüogo aser pai külem West Indies nunger Kieron Pollard melentsü, shiba lenisüba nung team taoba season asaya liasü.

"Iba left-handed wicket-keeper batter ya alima nung ajaki tsübuba asayar ka lir. Pa tang temaba jenjang nung asayaba mapang pai anir team takok dangi aotsü renema lir," ta kasa sangdong ajanga metetdaksü.

MI New York pur Major League Cricket 2025 season nung mezüngbuba asaya June 13 nü Oakland Coliseum nung Texas Super Kings den asayatsü.

Leverkusen-i Axel Tape den tenangzüktepba yangluogo

Aami/June 11, 2025 (Agencies): Bayer Leverkusen-i France nunger youth international asayar Axel Tape Paris Saint-Germain indang under-19 team nungi free transfer nung anir aruogo.

Arishi küm 17 tain defender shiba aso kanga talang lir, pai Leverkusen den küm talangka atema tenangzüktepba yangluogo, ta iba Bundesliga club ya Bodhbarnü metetdaksü.

"Tape ya sempet aika aketba defensive asayar ka, kanga kara asayatetba football asayar ka, athleticism aser tesangra asayar ka lir," ta Leverkusen sporting director Simon Rolfes-i ashi. "Axel dak sempet tajung aliba onoki reprangteter aser pa free transfer nung anir aruba ya tarutsü atema team yanglutsü merangba mapang tongtumbang jenjang ka asütsü.

PSG indang under-19 team-i tawa French championship akokba mapang Tape-i tongtumbang shilem agia liasü. Pa senior team nungia asemben

asayaogo aser osang ajanga ashiba agi pa Eintracht Frankfurt aser Tottenham Hotspur natia alizüknüa liasü.

Offseason nung Tape densema Leverkusen puri lanur asayar anabuba den tenangzüktepba yangluogo. Parnoki arishi küm 19 tain Ibrahim Maza, Hertha Berlin nungi anir aruogo.

Coach Xabi Alonso-i club toktsür Real Madrid-i aoba sülen club nung temelenshi aika adokdar. Team captain Jonathan Tah-i tenangzüktepba meyanglushi aser pa Bayern Munich nung denogo aser wing-back Jeremie Frimpong-a Liverpool-i ogo.

Nüngtugu asayar Florian Wirtz-a mapang tatsüka tsüngda Liverpool-i aotsü imalar.

Alonso-i club toktsüba sülen Leverkusen-i pa melena taoba Manchester United coach Erik ten Hag shimogo. Taoba hopta parnoki Brentford nungi Netherlands goalkeeper Mark Flekken alizükogo.

Iba den bendenloksema Leverkusen-i Bochum nungi arishi küm 21 tain defender Tim Oermann alizükogo aser Austrian champion Sturm Graz dangi loan nung yokogo. Kasa mapang nung midfielder Francis Onyeka taruba season atema Bochum-i loan nung yokogo.

BENDANGLI OSANG : Tapak 7 nungi...

US-China tsüngta shishilempaba...

Taoba hopta Donald Trump aser China lenir Xi Jinping tsüngta phone ajanga jembiba sülen linük ana nungi ketdangsürtem maneni ajurutepe jembishinüba ya kanga tajung liasü, ta US tiri ashi.

"June 5 nü linük ana tekolak phone ajanga jembidang mulungtepba aser Geneva senden nung mulungtepba mapa kuma inyaksü atema principal nung framework ka renemetetogo," ta China indang Vice Commerce Minister Li Chenggang-i ashi.

Küm tetenzüklen linük balala nungi osettsüet bener aruba nung tariffs meshitsü Trump-i sangdongba ajanga China dak tesashiba kongshi. Beijing-i yangji telangzüba agüja US imports nung jenjang

tali atat aser iba yongji tayang kepzüktepa tariffs meshitepba shilem 145 tashi tua liasü.

May ita Switzerland nung linük ana ajurutepe senden amenba ajanga khen atema tariffs temlokba anena liasü.

Iba yongji US-i China nunger oset nung meshiba tariff shilem 30 kuma ajemtsü aser Beijing-ia US imports nung tariff shilem 10 dang meshi aser 'critical mineral exports' nung tetsükdaksü agentsü nangzük. Iba yongji trade deal ka yanglutsü merangtsü asoshi linük anaprong nem anogo 90 züngzüksü.

Ajisüaka US aser China linük kati ka dang 'non-tariff pledges' nung aibelener ta tai tongloksütetepa liasü.

South Korea-i North anema...

Pa melensang Lee-i election atema nüboyimba mapang tenangzükba aika agütsüogo, kong Pyongyang den sensaksem tenzükshitsüba aser linük ana tsüngda tensa mejungi aliba tajemba kümdaktsütsüba densema lir.

Linük ana tsüngda kati ka dak temulung lemteta kümdaktsütsü aser Korean Peninsula nung yimjung bener arutsü nükjidong nung iba jenjang agiogo, ta military-isa shisem.

Ajisüaka North Korea nunger human rights tajungba kümdaktsütsü pusemertemi iba inyakyim anenba ya aitsüogo. "Loudspekertem ya North Korea nunger atema mamatoki lir ta lephsia metetdaksüba ka liasü. Item ya shibangba ajanga Kim Jong

Un-i par nüburtem alima nungi bendanga ayutsü merangba tali tashi taitba kümdaktsütsü," ta Seoul nung amendaker aliba Database Center for North Korean Human Rights Executive Director Hana Song-i ashi.

Ajisüaka arrtsü nung aliba nüburtemi iba jenjang agiba ya pelashishia agizükogo. Parnoki joko ita aika South aser North naprongla nungi loudspeakers ajanga ola adokba agi alakba ashishia aruogo.

North-i arrtsü adena balloon tem nung jana bener yokba anenba sülen military-i iba jenjang agitsü telemtetba agia liasü. Ajisüaka nüngdak dang süra military-i iba inyakyim ya tenzükshitsü akok, ta Yonhap news agency-i metetdaksü.

Man City-i pound million 46.5 agi Reijnders alizükogo

Aami/June 11, 2025 (Agencies): Manchester City-i, AC Milan midfielder Tijjani Reijnders pound million 46.5 agi alizüka küm pongu atema tenangzüktepba yangluba sangdongogo. Netherlands nunger international asayar ya Rayan Ait-Nouri, Marcus Bettinelli aser Rayan Cherki nunger sülen Pep Guardiola-i alizükba asayar pezübuba lir.

Arishi küm 26 tain Reijnders den mapang shitak nung tenangzüktepba yangluogo aser pa iba ita America nung Club World Cup asayatsü atema temsüa lir. Pa June 18 nü Wydad FC den City nungi mezüngbuba asayatsü akok.

"Ni Manchester City den adenba atema kanga pelar," ta Reijnders-i ashi. "City ya alima nung team tulutiba rongnung ka lir, kong coach tajungtiba aser world-class asayartem lir aser

facility-a kanga tajung lir."

"Pep Guardiola lenisüba nung City puri title aika benogo aser taruba kümtem nunga takok tali ngua aotsü atema ni teyari agütsüner," ta paisha ashi.

Midfield nung asaya sang ya Netherlands tenüng nungi 23 ben asayar lir, ajisüaka Mongolbar aonung Malta goal 8-0 agi akokba asaya nungbo pa masayadaksü.

Pai taoba season Milan nungi tetoktepba ajak nung asaya 54 nung shilem agi aser iba mapang goal 15 idaktsü aser pa nem Serie A's midfielder of the season naroküm agüja liasü.

Kevin de Bruyne-i club toktsür aoer asünung Reijnders-i ground teyong nung team nem teyari agütsütsü, shirnok taoba season asembuba nung tembangba sülen jenjang yanglushitsü imla atadar.

Club World Cup atema koma

asütsü ta bilema aliba mapang Manchester City-i kanga kara jenjang agia asayartem aika alizükogo.

De Bruyne-i club toktsüba ajanga attacking midfield nung tapok adokdaksü aser City puri Bayer Leverkusen nungi Florian Wirtz alizüknüa liasü saka iba jenjang magitsü telemtetba agiogo.

Iba melena parnoki midfielder Reijnders aser Cherki aser left-back Ait-Nouri nunger pound million 108 intoka alizükogo, koba Wirtz atema euro million 150 meshiba dang nungi dalangba lir.

Parnok asem den goalkeeper Bettinelli-a Club World Cup nung asayatsü temsüa lir. Iba asayamung nung City pur mezüngbuba asaya June 18 nü Philadelphia nung Morocco club Wydad AC den asayatsü.

Ancelotti lenisüba nung Brazil-i mezüngbuba asaya kokogo

Aami/June 11, 2025 (Agencies): South American qualifying nung Brazil-i goal 1-0 agi Paraguay koka 2026 World Cup atema qualify süogo, koba Carlo Ancelotti lenisüba nung team-i mezüngbuba asaya akokba liasü.

Real Madrid forward Vinicius Jr-i asaya tanabuba shilem nung Manchester United-i aotsü aliba playmaker Matheus Cunha-i agütsüba ball ka kanga junga idakja liasü.

Ancelotti lenisüba nung Brazil tem taoba hopta mezüngbuba asaya Ecuador den goal kaka danga magütsüteti tembang, saka tang iba asaya koktetogo aser iba tetezü Brazil team tang tashi nung

World Cup ajak atema qualify süogo.

"Iba asaya koka World Cup atema qualify asütsü nüngdaka liasü," ta Vinicius Jr-i ashi.

"Tang coach asoshi mapa inyaksü atema mapang timba angutsü. Hau tanü kanga jungabo masayatet, saka ajak dang tongtumbangtibaji takok angutsüba ya lir. "Tang qualify sütetba atema benjungtsüba mapang lir," ta paisha shisem.

Kasa mapang nung World Cup bener aliba Argentina team aser Colombia na Buenos Aires nung goal 1-1 agütsür asaya tembanga liasü.

Asaya nung mezüngbuba goal ya Liverpool winger Luis Diaz-i

idaktsü. Pai defender asem paitoka lur Aston Villa goalkeeper Emiliano Martinez ajanga ball metsüokja liasü.

Asaya atemtsü minute 20 angua lia Chelsea midfielder Enzo Fernandez nem red card agütsür tugudaktsüba sülen Argentina team nung asayar 10 dang aküm.

Ajisüaka asaya atemtsü minute 10 anunga lia Lyon' nungi asayar Thiago Almada-i Argentina atema goal ka idakja goal kasasa küma liasü.

Maneni Ecuador-a Peru den asaya goal 0-0 nung tembangba sülen taruba küm Canada, Mexico aser United States nung asayatsü aliba world Cup atema qualify süogo.